

靜

厓

詩

續

稿

靜厓詩續稿卷三

鎮洋 汪學金 敬箴

古今體八十五首

辛酉四月
盡十二月

題白少傅像

詩格清新老愈工
道緣深重遇尤豐
會昌時世閒居士
不在恩牛怨李中

和答瑤華子

海山終有相逢處
家室今留未了緣
日課黃庭無一事
閉門瑤草護胎仙

題蛺蝶花分韻詩冊

為蛺蝶為周兩未真緣何又幻此花身才人綵筆工香草
畫史冰綃黯劫塵游戲蘭若羞薄艷描撫金粉悟陳因
葛仙衣帔誰能識留得羅浮萬古春

橘叟賭棋歌

仙人飛下蓬萊闕却笑壺公計殊拙九還游戲巧藏身
一點黃金鑄秋橘橘中何有有楸枰兩叟無機偏有情
已從桃源忘人世翻怪商山留姓名混沌由來莫輕剖
此局應同天地久桑田滄海太須臾可惜人間無國手

攻圍劫殺紛如煙古今黑白終茫然湘東隻眼竟何在
垓下重瞳逝不還鄴侯動靜言雖妙謝傳輸贏事難料
呼盧喝雉漫相爭失馬亡羊豈勝道回頭學唱採樵歌
只願仙人許爛柯洞庭春色猶堪借踞獻筵前蘸甲螺
君不見橘官無俸空錄錄橘奴千頭苦未足何如橘叟
樂長生醉酣且賭瀛洲玉

陸璞堂臬使過訪以適園灌畦圖索題句璞堂由
光祿少卿陳臬江西旋移浙江引疾歸適園其七
世祖文定公別業也

共有江湖思相知廿載深卿材光幕府祖德重園林適
趣觀濠上忘機學漢陰會須堅晚節端不負初心

百里樵風便扁舟梅雨來浮家書卷在對榻畫圖開回
首蓮花炬傾心竹葉杯就君飽蓴菜泖水碧于苔

晚步後園

病骨經秋強自持夕陽影裏瘦筇支幽篁泣露香蘭笑
哀樂無端却為誰

桂花下作

愛爾頻招隱秋來花滿廬朝芬和露重夕影帶風疎月

裏傳仙曲淮南有道書青青好柯葉歲晚更相於

新安琴客朱賡平彈平沙落雁漁樵問答二曲即
用其韻贈之

蕭寥萬象足音稀默葆先生杜德機回首風霜成百感
驚寒幾陣到江畿

黃海家山別數秋又攜襆被下江州漁樵到處堪為侶
譜我閒來擊壤謳

憶橘隱處瑤華子題贈也令弟守根為作圖紀之
以詩

當年姑婦對楸枰一著仙機局早成今日橘中留隱趣
白頭同憶海山盟

謝皋羽竹如意歌

湘枝碧灑英皇血點點斑斑入霜節孤根不死抱哀怨
化作先生手中鐵先生晞髮登西臺高呼朱鳥魂歸來
六陵冬青安在哉烟沙茫茫暗柴市石破天驚醒天醉
世間那有事如意恨汝不為博浪椎大澤亡命將焉之
恨汝不為魯陽戈虞淵日沒可奈何五坡嶺零丁洋厓
山風雨翻滄桑左招括蒼叟右攜容州翁一聲一淚落

秋水捶碎七尺珊瑚紅至今山猿叫寒綠瀨急林深疑
慟哭小爐峰下吊遺民合配桐江一竿竹

再題橘隱圖東謝守根

月姊當時飛上天為言橘叟是雙仙鑄金難買商顏樂
賭玉還題海嶠緣一住壺中忘甲子重來紙上看雲煙
他年證取曇師跡賴有緱山翰墨傳

老友蘇琛溪為余總角交中間阻絕者幾三十年
聞有見存之意作詩招之

少日飛騰意各矜中年契闊感難勝
磨官廳了愁衰疾

書人言集卷三
四
勉學無成畏友朋指數晨星雙白髮心懸夜雨幾青燈
籬花開後同君笑晚節寒香信有徵

對菊疊前韻

恥與春葩色共矜傲霜老圃骨差勝歸來却喜渠偕隱
覲止應誇我得朋遲莫容顏新照酒清寒形影慣依燈
初衣已解先生組緋紫何勞說貴徵

琛溪枉存與之論詩竟日仍用前韻奉簡

詩律精嚴老益矜偏師摩壘許誰勝斲輪獨擅超心匠
攻錯相資異面朋座下有機惟一鉢室中無盡是千燈

願君勤泛仙潭菊
汐社須眉表壽徵

琛溪過訪小園翼日贈詩二律次韻奉酬

一昔題襟歲月長
閩山楚水記徜徉
故人重醉茱萸泚
良士同吟蟋蟀堂
倚竹久時嫌袖薄
坐花近處覺衣香
田園歸去身將隱
邱壑由來道未忘

冥冥鴻飛不漸遠
非關室遠未之思
出山小草慙摧落
在谷生芻喜繫維
風雨殘尊心自許
江湖叢藁手還披
歲寒會上頻開徑
要看簷梅細細垂

和琛溪雨中赴飲之作

淮南叢桂已行招定有騷人賦碧瀟聽雨尊壘懽最洽
衝泥笠屐興偏饒為聯雅會消寒永共證幽懷入夜遙
流水知音原曠代琴材莫惜爨餘燒

對菊同和陶桃花源韻

幽葩無媚姿佳色自絕世每待素節榮遑惜青陽逝昔
余困羈絆三徑漸蕪廢今茲謝宦組一畝遂寧憩高卧
習忘機端居涉游藝詩遲亟索逋釀熟少監稅耘羔露
下肥杞徇月中吠秔粥療朝飢薺藿出家製良朋不速
來俗士末由詣日月忽已除風霜復加厲行樂須及時

為歡聊卒歲澹情託雅交靜理生禪慧揭爾坐花龕即
此入香界蕭疎得其真曠逸祛吾蔽百齡奚足多四大
皆可外逍遙柴桑翁千載有同契

酬和滄來守彭城寄懷之作聞莅吳消息

楚浦吳江極日秋相思兩地迴含愁寒花時節難開徑
明月天涯却倚樓僕病已成歸壑水公才終作濟川舟
遙聞父老迎青鷁自笑漁樵侶白鷗

滄來以題譚山人畫菊詩索和兼惠木瓜因和元
韻酬寄

青人言系禾
老筆貌取霜中妍黃樓已過重陽天爭題醉墨喧四筵
彭城詩守今坡仙一詩脫手萬口傳豪氣壓服呂梁川
汙邪滿車歌有年脚躡踏破黃茆巔霜銜夜落魚龍眠
風雨櫛沐髣髴髮宣寸陰運甕惜棄捐流連光景殊不然
當官一意愁艱鮮金鈿翠袖拋那邊生平肯為花放顛
却笑病叟歸計先海田種菊耕蒼烟白永送酒追昔緣
報公愧託木瓜篇

題婁東十老圖

名教歸鄉黨風儀見隱淪同時首陽節幾輩義熙民絕

業宗伊洛通儒首陸陳顧王資興洽江盛底精純磊落
收餘子婆娑會十人生初丁極否明季屬多屯揖讓章
縫服流離草莽臣深心痛永乘微尚表松筠却聘投書
切潛夫著論頻入山先避地于野各依鄰志合兼師友
情孚迭主賓斯文存碩果吾道續遺薪體用隨舒卷行
藏寓屈伸冰霜堅骨性雷雨鬱經綸里塾淵源在門牆
槩獲循擇交皆諤諤辨物必斷斷皐帽甘肥遯青氈忘
瘠貧或逃方以外

圖中僧服者為
宋荊齋先生

終老海之濱歲月成

耆舊衣冠寫影神當年留粉墨曠世接音塵江左稱才

數婁東重雅輪弁山縞紵廣復社敦盤新藉甚榮肇悅
禁茲潤玉璫語言空自好聲氣競相因城闕譏俠達邦
閭名吠狺喧呶矜戶牖渙忍愧簪紳賴此維持力恒於
砥礪親品從秋實固誼到歲寒真亮德興頑懦嘉修華
訟囂四方尊學術百族厚彝倫淳閭羲皇侶逍遙策許
身前模觀卓犖末殖望逡巡攷乘嘗懷渴披圖亟飲醇
心期游浩蕩氣宇發和閭柳下過眉杖花邊墊角巾閭
奇蔚村酒勸饌澌湖尊拱手推更老隨肩列介僎圭棧
標五嶽光燄動三辰慕善恭桑梓思賢潔藻蘋願將香

一瓣持以壽千春

穿山

稍存邱壑趣本乏雨雲姿一郡徵名獨百家聚族斯天
光穴終透石骨性難移絕似支離叟頽然卧海湄

曉之虞山口號

烟浦分前邑西風曉射眸青山收雨脚黃葉打船頭百
里過從便三峰信宿留芒鞋自茲始得得未能休

泊舟山前

近湖綠淨不可唾遠山翠微如相招今朝天與游人福

過午晴陽恰繫橈

虞山古蹟五首

巫咸宅

傳巖居版築莘野起鼎俎頡頏有巫氏發跡自海左繼
體兩賢弼當作世家補

虞仲墓

兄以天下讓弟就逸民伍采藥類求仙遺蛻一杯土山
名乃稱虞知為福地主

尚父湖

太公昔避地曾居東海濱及其釣渭璜乃與文王親茲
湖號尚父顯晦殊失真

子游祠

卜氏盛西河言氏道南矣蔚為文獻邦一脉始於此泠
泠琴川水弦歌猶在耳

昭明讀書臺

選樓冠江雲圮臺隱海霧一化讓國風溘逝先朝露湘
東讀何書戎服講已誤

入破山寺訪性上人次唐常尉韻

性公吾里秀住錫古禪林到寺不知遠入山從此深雨
花千佛讚霜葉十年心燕坐聞虛籟泠然碧澗音

維摩寺坐觀海樓

毘邪一口吸都盡海水天風滿八窓樓勢欲隨飛驚動
潭心應有蟄龍降半空林壑飄鐘磬幾劫滄桑認刹幢
容我春浮老居士淨名經卷伴龕缸

歷探山南拂水劍門諸勝

昔聞拂水巖懸流飛百尺南風倒激之噴沫濺巖額吾
來值冬涸藁巖閉幽隙導以青筇枝始達涓涓脉夙懷

苦未償餘賞，耿難釋回頭。
豁雙眸撐空，露竒石乃探劍。
門勝崎嶇，歷峯峇天，闕關洪荒厥跡。
巨靈擘巍巍磨崖，書鋒棱見筆畫，注目神愕。
貽撫掌聲，嘆惜偉哉造化功，觀止欣剏獲。

三峯清涼寺

幾家北秀與南能，此地禪宗感廢興。
梵刹昔開烏目澗，影堂今見白頭僧。

寺有漢月和尚像

苦將文字傳三昧，猛為因緣續一燈。

畢竟同歸無諍法，寒山落葉悟空乘。

松泉寺尋小石洞

泚泚青瑤流窅窅白石洞巖扃阻曦車幽碧苔草凍坤
腹養真陰千脉發乳湏滴滴看跳珠疑有鮫人弄倚石
聆希聲寒霧襲衣重暝鐘催下山歸袂天風送

霜葉作歌

鴛鴦叫寒天雨霜風日慘澹雲蒼涼我游海虞眎重岡
佳木林立山之陽楓枌杉柏楸梧樟起伏向背為列行
青女狡獪不可量朝來炫服施新粧絳襦紺袖襲纁黃
拖藍曳碧紛飄揚窈窕十色含五光髣髴羣仙下瑤閭
玉娥隊隊雲錦裳前節後纛高幄張麇師鳳儀孔翠翔

琮璫黼黻交焜煌中有梵剎梯虹梁化人瓔珞坐道場
金銀琉璃七寶裴艷如春韶布雜芳桃村李鴈丹杏坊
一一姪姪舒苞房令我顧盼治目狂歸來儻恍難具詳
抽管欲賦心茫茫夢花謝後無文章頽然一醉投匡牀
千紅萬紫亡何鄉

欲續游破龍桃源兩澗為雨所阻寄題二絕

松蘿影裏斷崖青欲認當年鱗爪形只恐芒鞋踏龍脊
滿山風雨晝冥冥

霜葉如花映石林彎環也比武陵深如何一夜山中雨

竟使仙源不可尋

海虞雜詠

拂水山莊樹石隤絳雲書卷久成灰
世恩祠下重擡首
齒冷當年褚彥回

牛山出涕亦何因
齊女思家竟殞身
指點秋蕪遺塚在
一杯終勝治吳人

家園累葉沒蓬蒿
填海多年精衛勞
碧血游魂渺何處
蠻花狔鳥小東臯

血裏朝衣骨未摧
眼看銅狄志難灰
英雄氣節歸無用

願作山門龍象來

禪門衣鉢說三峯一點機緣落箭鋒只恐波瀾成劫濁
難將法杵鎮天龍

怪底居人習打生山中禽鳥閒無聲法王滅度空持鉢
合眼紛紛怖鴿情

山腰城郭山心市衙鼓寮鐘相喚應世出世間叅不二
上來游客下來僧

青山埋骨日紛紛散食寒鴉噪晚羣豈獨生存華屋感
瞿家墳屬蔣家墳

紫芥黃菘莫浪誇
九秋風物愛南沙
霜前松菌蟠芝朶
雨後鶯芹茁玉芽

三吳財賦古稱饒
此邑田疇沃不饒
隔歲冬春謀實廩
爭來湖下選長腰

晚照拓成山紫翠
曉霜寫出樹丹黃
我欲竟呼石谷子
重携老筆點清蒼

浪子才華競冶春
南朝璧月遞翻新
近來撫拾稱吳體
更與隨園作替人

聞吳穀人祭酒乞養得請計日南下喜而有作

但逢為私百事了偶乘鱸興兩人同槐花黃後朝投匭
君本年錄科事 風葉紅時夜挂篷就近湖山歸地主現
竣始具章陳乞 成風月付天公相逢相喚還相笑春夢無多一霎空

菜圃四首

學稼吾未能學圃猶庶幾屋隙劣半畝瓦礫境不肥艱
難理犂确怕苦生意微土宜隨樹穫焉用求芸薇
異菜名芸薇 就旁得甘井灌溉幸無違抱甕敢憚勞守
見拾遺記 拙聊忘機

兩年出山去三徑恐就蕪妻孥知吾意黽勉親耨歸

來詫籬落青碧相縈紆晚菰及早韭供我不時需家食
恣一飽沒齒樂有餘生平志偕隱所得良匪虛

側聞溽霖灾近輔成沮澤桑乾苦橫流

至尊憂旰食舖糜萬鳩鵠湍目尚菜色壤蔬蕩根株市

價倍什百冬蓄無可謀春盤更誰覓長安數寄書

博兒書來

屢言支念之詎能釋獨飽亦何心徹箸起歎息

先民有遺訓努力齧菜根此事非大難要為肉食言腐
儒嚼黃蘗一鉢分緇髡清寒出霜露甘脆逾羔豚生涯
在環堵那煩地主恩誠哉不貲富將以貽子孫毋忘藝

薑芥正味賴長存

題陸桐庵表甥雙梧草堂圖

吾愛兩王子

葆初守根兄弟

亭亭青琅玕
閉門破萬卷
拭目翮

鷄鸞陸郎太原出
試啼識英物
見汝崢嶸姿
憶汝婉孌
白雙梧
問舊廬
老碧近何如
草堂聽雨夜
覆汝一床書

捉月行

錦袍仙人笑而起
倒指青天出江底
赤脚踏破廣寒宮
世人浪說神仙死
此時采石烟荒荒
素波未委先有光
須臾江天蕩精魄
夜珠只恐蛟螭得以手捫之忽有棱

脆彈欲作玻璃聲瓊樓玉宇落吾掌褰裳便有凌虛想
小時呼作白玉盤見汝高挂我眉巔出入金門游戲耳
愛汝遠照長安市長安浮雲蔽白日愁汝亦被妖蠱食
乾坤簸盪太陰黑嫦娥飄墮夜郎國悲哉何不鑒余之
忠誠搔首茫茫淚沾臆今宵酌我金叵羅洗汝青蒼好
顏色馮夷擊鼓龍吹簫大鵬變化何逍遙長庚飛來歎
瑤闕捉住蟾蜍卧冰窟夢中一曲聽霓裳恍惚沈香味
花月噫吁嚱騎鯨去後不復還豈必綠骨藏青山英靈
萬古歸何處江水東流月在天

得葆初寄書知於重陽後一日自欽州發棹還里
蠻江櫓指重陽菊嶺驛詩題十月梅天末懷人諸子共
歲寒待汝一尊開逆風已先征鴻返排日應隨寄鯉來
休論歸袞博談笑粵南早重陸生才

○病菊吟

瘦香一枝秋鈴坼霜花滿簾燈火青夕英顚顚魂不醒
花神漸欲離影形九陽思駐仙人齡顏色枯槁氣自馨
朝來晴日烘短櫺井眉轆轤水瀉瓶夢回始覺刀圭靈
為君琅琅誦黃庭

○讀淮南子

淮南好神仙著書總道術奇文秘鴻寶中壘事祖述今之所存者內篇二十一高許繫訓解粲然具章質瑰麗揜騷雅曠放競莊列是時賓館開馳騁奮才傑其言博而辯漫衍不可詰篇終舉要略大指頗條析盧牟苞陰陽著凝入泰壹得失胚錙銖禍福樞芒芴恬愉返天和羣生被休吉以此示龜鑑性命庶無拂何為踵覆敗行事恣狂悖左雷外召戎茶陵內伏螭非分覩神器轉瞬就夷滅若云大明道造化等伸屈逍遙軼埃壙一得萬

事畢下視南面王棄若敝屣脫嗟哉名實違曷以稱鴻
烈我聞古至人純氣游渾沕文字皆贅疣口耳亦偽物
輟簡發空喟請謝窮年斲

冬曝行

先生頭腦何冬烘羶鞋絮帽裘蒙茸陰寒中人氣慘慄
坐令卯酒全無功須臾朝暉射簷隙凍松折竹皆顏色
我亦因之負而立百脉氤氲澤膚草呼吸痛癢物我俱
世間乃少趙子餘病夫僵蟄不出戶袖手四顧空踟躕
要知元氣幹真宰天光一照扶衰餒但願丹葵向九

霄徧覆黃棉歡四海

碩果吟

宣尼繫匏歎不食莊生慮瓠恣所適物之不齊乃其天
全乎天者貞而堅在剝上九著斯理碩果之象比君子
杞包瓜隕自姤始遯退否消漸至此處剝之道順而止
為君子謀可思矣坤陰先幾示履霜疑陽必戰愁元黃
无咎无譽慎括囊含章有終地道光君不見萍實浮江
大於斗一出已為楚人有又不見離離朱實呈琅玕蟲
穿鳥啄爭摧殘江南霜橘孤不落此中大有商山樂芋

魁燒熟無多言休歇蒲團罷行脚我為碩果吟喟然意
何深朔風凜烈浮雲陰仰視閭閻杓衡森寂寥萬象難
窺尋朝來笑坼冰梅口默勘羲爻天地心

蠟梅

一樹最先春年光入眼新供依黃面佛開待素心人幽
獨自堪悅荒寒聊與親從來居士室嚼蠟笑橫陳

洪稚存太史自晉陵過訪賦贈

偶題醉墨大羅天勅下蓬萊看謫仙日觀鳳鳴真遇
主雪山羝乳不踰年卷施未死心常在

君有卷施閣集

楊柳難

靜厓詩續稿

卷三

七

攀意總懸

出塞日同館
追送不及

今夕一樽重話舊夢魂猶繞玉

堂前

題姜如農先生藝圃圖

萊海家何在宣州或不歸寓公堂構有地主姓名非

已圃

易主

世澤留緬素雲仍接紫緋百年忠孝蹟展帙重歔歛

春浮子編輯婁東詩派成為諸詩老設供後圃建

水陸道場七晝夜用瑜伽薦度法並考生平行詣

分為上中下三壇別設閨雅一壇將以消綺業結

勝因願此文字功德回向三寶普度一切有情時

嘉慶戊午四月既望也越辛酉長至後更生居士
自晉陵過訪稔其事曰是不可以無詩首倡柏梁
體一首余不獲辭乃偕同塾諸子追賦焉

華嚴世界兜羅雲大千湧現芬陀芬人間慧業生天果
物外真言度劫文海東迂生願難足普為才人種才福
乞師遞演法三車呈佛先鈔詩百軸戒香第一懺詩貪
婪想饕情不易芟擗捲千篇矜獺祭紛綸萬緒困蠶銜
次為才人懺瞋恚白眼高哦出狂醉譏評有意託微詞
怒罵無端作游戲詩癡積習更多般綺語消除指一彈

特開淨社為吟社但入詩壇即法壇一壇直上須彌頂
河嶽英靈最高等忠孝文章重作家神仙位業推班領
一壇論品居次中冥陽生滅隨輪風根因不昧求無始
才命相妨怨豈終一壇沉沉慘不樂暫破鐵圍氣蕭索
雨濕秋墳鬼唱愁烟迷夜壑魔風惡別有一壇窈窕才
縞衣翠袖共徘徊曾從飛絮邊過也到拈花座下來
流鈴震杵聲何疾滴滴醍醐露珠溢點筆休憎鬼董狐
傳衣爭禮詩摩詰一詩一字印雙林了澈虛空水月心
普薰篤耨氤氲氣徧和頻伽微妙音太歲敦牂月在巳

轉瞬光陰猶可指六時緇白仰慈雲七日香燈讚流水
出山小別舊精廬藪橐隨身兩載餘護持每欲煩龍象
校勘終須辨豕魚更生居士仙才縱謫下蓬萊名愈重
行脚初從萬里回結趺同話三生夢君言此事風誼敦
欲歌哀些為招魂巾瓶偶證詩禪在衮鉞猶看詩史存
醉墨淋漓吐硤泚五百詩靈向君拜即看大雅播鴻篇
應識吾鄉有真派天寒日暮兩相思又是吳江月滿時
吾投蒲褐重翻偈君掃茆龕且祭詩

居士除夕祭詩歲以為例

椰子漿為葆初賦

海南椰子大如斗中有甘漿待君剖天涯霧雨遠致之
感子殷勤意良厚峯山玉膏不易得此物乃為瘴鄉有
昨隨嶺荔味沾脣今比湖橙香濺手諸黎荒陋亦可憐
多情爭壽眉陽叟負瓢哨遍枕榔林真一天然當淳醺
叶六千里外詫相逢七百年來嗟不朽勿愁枵腹看豐
年賴汝乞漿歡得酒

同稚存晚登梵鐘寺樓

踈鐘隔流水一棹野塘幽落日迷滄海寒風撼石樓人
驚天外至寺記劫前留彈指華嚴界僧雛已白頭

醉步後園

白髮殘年試藥醅
酖顏不覺色如孩
笑攜月下紫瓊竹
暗嚼霜中黃蠟梅
巷折漸闌雞膈膊
寺鐘微動鶴徘徊
飄然我欲乘風去
海上飛仙仰面咍

食芋戲作

雪屋高春尚擁衾
爐頭芋熟撥灰尋
生平不信懶公懶
宰相何關出世心

穀人先生過訪酒後偕諸子趣園觀梅以竹外一枝斜更好分韻得外字

逋仙飛到孤山外，碧海青天酒星大。十分月過二分花，
喚起東風一尊酹。長安憶花苦語君，君對西湖寄深慨。
今年同為看花歸，只恐相思隔吳會。天教韻事竟合并，
花亦留君作良會。竈觚霜菜滿把烹，甕裏冰鱸細絲膾。
興來秉燭不辭歡，暗逐幽香入荒薈。池臺如水影參差，
疑有縞衣弄珠貝。宿林翠羽噤高寒，忽遞孤吟戛清籟。
但覺酡顏倍有情，莫瞋醉眼渾無賴。我所思兮萼綠華，
翩然一舉成遺蛻。曾記花前勸我修冰玉，多應笑塵瑳。
花枝觸帽小驚猜，解道姑猶戲狡獪。月斜花韞更徘徊。

矯首羅浮紫烟靄夢回酒醒五更鐘一縷氤氲出巾櫳

題弇州祠

門閥雄江左文章罷濟南終天吟孔雀初地禮優曇慧
業升沉易去高名毀譽叅平泉花木記回首失三弇

題梅村祠

天興興亡筆淒涼庾子山可憐青史在不見白衣還花
月新聲艷江湖老淚潛冰梅撐鐵骨長守屋三間祠即梅花

庵改建

坡仙生日井福堂春幡聯句限虞韻

天上春先到

穀人

人間歲欲徂唐花催火速

靜厓

漢絲

借風紆社餞嘉平社

止庭

堂呈燕喜圖丹虬盤玄篆

訥

菴青鳥吐寅符典向蘭臺數

勤齋

枕依玉局輸笛情聞

翦鶴

密廬

鵠影盼飛鳬溫馥度持辦

寧夫

寒泉潔薦孟

芋羹霏白粳

葆初

柑酒釀黃輿曲擬迎神奏

守根

題煩

命使趨頭播芳信報穀

手筆妙才須生意更番換

靜佳

名得勝呼初韶開栗谷

止

內製出椒塗綽約飄瓊縷

歲粧綴采繡及時爭翦刻

勤

肖物極描摹稍粉驚颺蝶

密粘絲巧縫龜低垂縈鷺尾

寧

翹起拂蠶鬚活脫新毛

羽初排連小萼跼飾尊王母髻根簪笑老翁顙憶昔登

朝省穀頻年侍禁樞茶綱分學士靜蓮炬送宮奴傳賜

青冥迴止言歸白髮娛價高人日市訥樣膝上元衢薄

宦羈籠翮勤流光逝隙駒聳吟邀弟共密歌醉倩兒扶

一自騎驎去寧重來叱鹿俱音容如在也初杖履許追

夫公等清班接根詞曹寵錫殊閣門金帖子穀坊監

錦磨麻細字搖雙纈靜輕紋稱六銖紫羅猶貯篋止朱

組並辭襦雪棹移湖上訥霜筇話海隅兆豐占戴鵲勤

止武祝騶虞不動恭幢否密長宜結珮無護園先挿架

寧

媚竈待懸厨聯鼎聲相應

初

圍爐興豈孤蓬萊清夢

遠根

笠屐想髯蘇穀

歲暮即事書懷四首

垂老心情事事慵只宜蟄室守三冬歸田為愛陶元亮
辭祿曾師邴曼容霜菊病頭同伏枕冰梅笑口獨支筇
浮生春夢憑誰喚月落參橫子夜鐘

滄江風雅久沈淪汐社重題醉墨新梓里畫圖親十老

近得妻東十老圖諸子皆有題什

蓬山詩史得三人

吳穀人祭酒洪稚存孫淵如兩舊史

先後過訪趣園

海隅耕鑿昇平福野外漁樵放浪身試手龍公

催玉戲當筵傳琰莫逡巡

閉門流水指仙源結趣西涇賦小園屋角手雷轟臘鼓

座中鬢雪點春幡故人書札新湯餅蓮士書來知得子矣老友盤

飧舊菜根琛溪為余賦菜圃詩回首觚棱無寸補從容饘粥感

深恩

十分春滿一腔心世味消來道味深楮拙爐圍龐老話

麝蘇盃繞阮家林除夕前三日為樸齋老人八十壽課孫待報鶯遷谷

勗子行孚鶴和陰安樂窩中閒歲月逍遙漫學打乖吟

廿四日得京書和博兒寄詩四首韻

生平自信直躬行老境尤思坦履貞白社有緣曾學佛
青山何事更干卿清餘宦味頭綱若薄耐家風骨董羹
閒與妻孥作團話夜深爐火撥松明

亂頭麤服野人衰燕坐工夫學葆光陳迹每憐牛踏磨
勞生空笑馬求唐晚期橘柚垂榮實密護芝蘭結善香
為愛竹林饒逸趣但招嵇阮謝山王

送臘尊盤又薦辛東華軟土夢中因臣精已憊慚縻爵
汝力方剛勉致身芳樹不言溫室事好花多伴直廬人
國恩三世勤酬報容我江村署老民

春風先向酒顏生屈指音書匝月程
叢桂尚留山隱約老梅彌有歲寒情
曹溪一滴龜毛拂緹嶺三聲鶴背笙
漫道瀛洲曾賭玉仙枰原不計輸贏

蛟門同學新署觀我生齋詩以落之因和元韻奉

贈

時拔萃不
赴廷試

聞道橋門六館開期君聯襪到蓬萊
爭招髦士翹翹往獨見幽人坦坦來
橘不踰淮愁化枳竹能傲雪笑逢梅
眼前別會觀生理鷗鳥忘機傍水隈

題滄來守雲龍山課士圖借用坡公過雲龍山人

張天驥詩韻

一官無長物惟有畫圖好
瞥眼雲龍山思君彭門道處
瘠讓衆肥餘潤及桑棗
三年政有成十郡名愈噪
訟庭寂如水花落長不掃
人歌名伯棠士識鄭公草
偶從步屐游肯放接羅倒
譚藝樂英才孰經嚴師保
愛汝黼藻宣期以玉雪澡
猶憶治婁日下車禮衰老
善交久而敬存問到童媪
蕭灑梅朵吟澹泊菜根芼
相知露肝膽羣彥見懷抱
千里數寄書道我歸來早
同心貞歲寒河水拍皓皓
載賡柞械篇豈弟獲神勞

除夕口號

爆竹聲中餞歲盤
歸田婦子話團圓
五更醉夢何曾醒
却向天街踏鼓寒

靜厓詩續稿卷三

靜厓詩續稿卷四

鎮洋 汪學金 敬箴

古今體八十三首

壬戌正月
盡六月

壬戌元旦試筆

歸田歲月者番新止足方知晚福真自在幸為三樂叟
太平喜見七年春耕縻安穩閒如願詩筆酣嬉健有神
却憶東華催曉漏脚韉手版早朝人

春朝仍前韻

一片韶華物外新十分生意醉中真池先旭影魚鱗暖

樓近風光鵲舌春
篤在勾萌培木德
巧防翦刻損花神
曉衙催報鞭雷動
莫擾西村抱犢人

微雨

雨脚隨春脚
因風到不遲
和神花眼見
生意草心知
及此回冬旱
相將入夜滋
野夫難濟物
憂喜繫天時

舊臘得蓮士
手書并以題
井福研詩見
寄因和元韻
奉酬

辭組歸來學退耕
喜聞密勿贊平成
故人鄭重緘瑤素
新什高腴泐石泓
翻驚兩階功者定
乳菟三日氣縱橫

書中所述
近事也

臘除吉語爭傳說照座驪珠眼倍明

元氣為舟舵不偏頂花結就自然煙跨鼇客熟峰頭路
叱鹿人尋海上田蓬闥清班陪後進瑯環福地託前緣
青禽又報春消息樞府新勲注玉編

醉後偶占

春來三日雨如酥放倒花頭懶不扶恰有東風勸沉醉
罷余擁枕夢糝糊

曉晴喜聞鳥聲

積雨罨深寒春禽噤如瘖竭來破幽夢啁哳弄新曙晴

陽發暄機殘滴猶在樹須臾炙笙簧東風引翩翥萬片
玉梅花尋聲不知處

人日雪

盼臘空穿眼尋春忽繞髭恰添人日瑞倍與老懷宜七
菜朝羅榼雙柑晚鬪卮衝寒還倚醉花月共迷離

穀日招諸君小飲

密坐春寒重傳觴到夜分雪融都作雨月出不離雲農
諺占新穀人情惜故枌幾回梅樹下醉眼白紛紛

池上坐雨作

桃源漫道已知津
城市居然作隱淪
一片鷗波天地外
春雲如夢雨如塵

正月十三夜月

暮靄散江城
殘霞海上明
夢隨修月冷
天放試燈晴
白髮支離叟
青陽爛漫情
騰騰轟醉耳
童穉徧春聲

上元即席分賦梅花送葆初公車入都

南枝初迎大庾驛

新自粵東歸

北枝又送長安陌
長安飛雪

未飛花要待王郎句
催得王郎弱冠試
南宮脫穎公卿
動顏色入世羞為桃李容
出山饒有冰霜格
芳筵佳節

競傳柑月彩燈毬鬪明嬾老夫舉琰勸遄行簪帽花枝
手親摘祝君努力致青雲得意春風控金勒新聲不唱
鬱輪袍仙才自領蓬萊籍百花頭上看題詩只有此花
宜此客

程愛廬侍御過訪奉簡

百里烟波路七年風雨思各存真面目重認舊須眉海
僻鷗心狎天寒鶴性知諸生迎杖履還憶執經時

琛溪抱恙未愈詩以問之

底事春融病未除比來餐飯復何如誰任問疾毘耶室

自得全形畏壘居
穉子已能親藥裏
門生曾否致籃輿
消愁便是蠲痼法
看取詩豪掃筆餘

春蘭

豈有當門忌終為在谷馨
微嫌風料峭獨抱露玲竚
著土根偏潔經冬葉自青
與君諧臭味一室戶常扃

趣園二十四景詩

松厓玩易

石壁鐫小篆曰靜厓余自號也前有軒為讀易處

靜處見天心於此悟真易
道人不出戶坐對太古碧
若逢治笈翁為我筮介石

桂岫吟騷

園桂二十餘株秋香滿林其有小山招隱之思乎

廣寒不可梯徘徊抱丹耿獨往山之幽手掇秋雲冷夜

聞木樨香晨叅金粟影

夜龕梵誦

小樓龕火閨人禮佛其中梵唄一聲萬籟俱寂在家已作忘家禪矣

泠泠齋磬圓燄燄龕燈閃夜明繞花林明星三五點獨

有妙蓮香清沁心不染

曉塾書聲

復初齋為課孫之所晨起倚杖而聽琅然盈耳洵可樂也

諸孫喜隨肩晨起各就塾老夫久廢書听然聽兒讀初

日滿芳林新鶯爭出谷

舫齋趺夏

船室數楹覆以槐柳午坐
儼然庶可傲龍纖子耶

坐來不繫舟得此無窮境

叶

澄波魚影閒密蔭蟬聲靜

可憐觸熱人甚於夏畦病

籬屋眠秋

揮籬種菊繞屋扶疎
我醉欲眠花其許否

秋色日已佳灌畦樂抱甕酒熟聊自斟何勞白衣送遙
遙千載心中有羲皇夢

筍厨觴政

暮春之初筍香釀熟
良朋萃止不醉無歸

始雷發東隅籜龍見頭角客言盤飮佳主勸觥籌數米
汁戒不持玉版禪可學

薇館茶禪

薔薇列架芳露點茶可參趙州一則公案

花露曉未收茶烟午初颺金鄉四甌偈

金鄉沙門福全能注湯幻茶成

句並點四甌共為一絕見清異錄

玉川七椀賸詩夢在僧寮領取石泉

餉

石梁銜鏡

跨池架閣倒景凌空水月交輝恍如廣寒游也

閣勢倒凌波池光平受月仙人駕長虹引我坐瑤闕素

娥正開奩清寒濯毛髮

水榭跳珠

溪雲初起山雨欲來飛榭四虛浮漚萬點剎那世界作如是觀

松濤繞壑飛竹溜當簷注起滅萬漚泡定香消一炷海

上弄珠人雲歸渺何處

柯巖弈手

山頂置石案畫棋局以待善弈者

巖頭趺已溫局外眼偏冷惟有石楸枰能駐仙壺景
所以橘中人樂與商山等

芥室琴心

焚香埽地而坐大室中自饒琴理何必撫操方移我情

妙樂本非聲停徽欲何待成連去不還心知古音在
洞鼓天風納盡須彌海

琅玕入徑

幽蹊曲徑脩竹成林嵇阮須來山王且去此君自有歲寒交耳

開徑招素心入林慰幽悅庭陰鏤翠寒空谷倚冰雪感

君不棄予磊落矜晚節

瓔珞開堂

古柏罩庭四垂瓔珞想見天竺先生座上說法時

徧滿香花雲天龍證一指偶示壽者相萬劫已不死座上菩提身庭前柏樹子

寒泉甃列

堂以井名取其潔也在山之泉君子有焉

井德不可名象筮勿幕吉欲施灌溉功先務潔治術一瓢樂有餘食福吾已必

老圃蔬香

臘甃冰蘆春盤露甲客來一飽不復向菜傭求益也

春冰鏗齒牙夜雨潑膏乳敢辭學圃勞供我無盡取野

夫自食力何須恩地主

柳亭聽鳥

芳柳依人新禽喚客
樂哉時乎知所止矣

春風如翦刀
宕漾黃金縷
留客坐溪亭
盡日繇蠻語
隔院聽笙歌
樓臺在烟雨

桐嶼觀魚

意釣非釣得其所哉濠梁之
樂會心在斯知魚者其誰耶

急湍無恬鱗
廣川有驚餌
誰知尋丈間
獨得生生理
釣海竭滄波
鄙哉任公子

換鵝波戲

春水初生得此左軍池
上物媿余之不知書也

陽羨書生去
山陰道士歸
留將小池館
愛爾好毛衣
春

醉新潑眼眈色認依稀

放鶴皋鳴

瑤草滿庭頂丹成矣
聞道已晚能無憮然

逋仙跡已逋招手古松下早梅花發時獨鶴歸來也
舉戲丹邱俛視乘軒者

瑤臺綽袂

林下高風天然冰玉
同人幾生修得到此

瓊樓雪作花瑤圃花為雪花雪春濛濛殘月露半玦清
夢破羅浮仙人笑吹鐵

玉洞緋衣

環池碧桃最盛紅白交枝照
水爛然武陵天台如在咫尺

出水戲桃孩春風初頰面洞口埽花人一年一相見昨

夜賜緋歸曾醉蓬萊宴

紅雲映日

初日芙蓉色香雙絕願此
花身供養如來成上上品

花開太華峰日出扶桑海西方覆髮雲湧現白毫采滅
香供佛來得此妙自在

紫雪霏烟

紫鳳翔霄蒼蛟舞雪老
萼新葩助我陽春烟景

誰將紫袈裟挂在峨嵋頂香林飄雨花搖曳春烟冷落
藥引游鱗窺見跣趺影

得琛溪和詩喜其宿疾漸瘳仍用前韻慰之

閉門萬想總芟除漸把浮休付一如機巧笑看秦吉了

窮愁苦憶魯爰居詩來健已神扶筆病去安須氣服輿
直待春深開社甕霜顛重對醉吟餘

二月十二日琛溪病起過訪喜而有作

幾回問訊倩詩瓢擬待嚶鳴破寂寥春減心情纏藥物

天留顏色鬪花朝強撐鐵腳筇輕棄

琛溪不喜扶杖閒捉冰毫

殘細澆

時以藥醪奉餉

從此趣園應日涉露桃烟柳已相撩

十五夜對月有懷琛溪仍前韻

會心點瑟與顏瓢底激商聲感沏寥好月有情聊永夕
飄風無賴不終朝忘憂只合提壺勸守拙寧辭抱甕澆

咫尺停雲漫延跂春寒尖緊莫輕撩

三疊前韻東密廬

觀生已悟水雲瓢自有閒心寄閒寥蘭抱真香非媚世

槿爭薄艷漫榮朝研朱點易循環數以決行藏密廬近推易浮白

哦騷次第澆又近石泉槐火候茶烟記取髻絲撩

叔溫歸自玉峰四疊前韻奉東

當年老鐵掛烟瓢賸有溪山付碧寥漁火親人曾越宿

樵風送客不崇朝小言蛭甲君能賦君蛭甲賦見賞學使者大戶

驚肪我待澆可愛涇西新柳色相迎青眼不勝撩

五疊前韻寄葆初

一路題詩已滿瓢
雨鈴風鐸伴蕭寥
遙知新燕銜花日
正是春蠶食葉朝
北斗臨垣光欲射
西山壓戶翠如澆
游蜂浪蝶狂成隊
獨有寒香不受撩

六疊前韻示守根

萬卷樓懸五石瓢
端居古調近寥寥
二難才雅爭前輩
君家萬卷樓為王
敬美先生故宅
三絕聲名動一朝
頭角崢嶸堪自信
胸中礪硯且須澆
莫將寒食東風柳
比似春愁不可撩

七疊前韻柬訥菴

藥爐經卷住團瓢一透禪關萬境寥為謝徵書忘歲月
漫勞衙鼓報昏朝君宅與州廨毗連淨叅栢子心同印弱護蘭
芽手自澆底事近來腰帶減知君泥絮已難撩

八疊前韻柬勤齋

春水船邊雨洗瓢閉門軟脚耐清寥君時有足疾難兄夢草

聯牀夕賢婦吹簫舉案朝社甕濃醺茶乳潑襖泮肥嚼
杏漿澆老饕耳食櫻厨美信手吟篇試一撩

擬陶日暮天無雲

日暮天無雲空色在止水微風一蕩漾中有淪漣起風

過漚旋滅滑碧平如砥萬類息相吹動靜根一理誰能
返自然觀化契無始

哭鮑雅堂郎中

白首為郎日青雲獻賦時祇緣崇替感竟與死喪期烟
水臨歧約風花觸緒悲江南寒食雨鬼唱鮑家詩

過叔溫書樓

聞君著書處一榻選清幽雨屐草深巷風簾花近樓新
泉長養研宿火久溫篝七椀玉川興心言殊未休

晚步城南看桃花

薄霽春寒減行行送夕曛花光穿綠水人影入紅雲物
外尋源香生涯計畝勤居人皆以種桃為業獨憐身世拙回首總
埃氛

擬陶仲春邁時雨

仲春邁時雨雨息風轉加翻覆殊未已吹落牆頭花朝
榮拂臺閣夕萎隨泥沙空谷不自銜寂然葆芳華感此
造物意勿為世所嗟

千葉碧桃

桃康戲崑崙浴海弄嬌姹東皇賜顏色萬卉罕匹亞露

含胞閨重風圻靨紋乍襞積同功絲複疊合歡帔層暈
破絳猩臍香裏紫麝絨素壁裁肪剖丹砂裂胯凌波鏡
粧出沃膏匱盥罷顰眉鎖歲蕤扶頭翻穠粧斂芭意溫
存舒萼態豐暇深情待蹇修密契託親婭窺鄰若解語
傾城莫酬價夕秀霞采攢朝容日光射低叢隱曲房高
枝拂迴榭掩映襯莎坪叅差雜藤架蠶鬢亂垂纈蜨粉
微補罅招邀繞裙屐留連引觴尊繁艷鬧正酣薄陰疾
如瀉儵忽有盛衰逡巡已開謝落片水爭流殘英草空
藉嬌嘿枉見譏環肥苦遭罵一番崔護悲幾度劉郎訝

錦華那可償烟景誰能賞遙聞玉洞居遐想瑤池駕武
陵欲往從天台恍相迓翩翩蓬萊姝邂逅維摩舍芳姿
信寡儔淨眼了無吒朶雲端芝厓瓣雪吐蓮華天天南
國春寂寂西園夜成蹊賤梯榮避俗羞銜嫁平添法雨
吹底礙罡飈卸六時入禪悟千齡委仙化倘逢掃花人
此帚終須借

和琛溪趣園看花韻二首

桃源疑有赤城霞步屨來尋不覺賒暇日聊為池上酌
老年肯負霧中花天光雲影欄空凭竹刺藤梢徑漸遮

回首蓬山春似水露珠墜曉月輪斜

近局相呼偶見存分明泥飲向田園浴蘭邂逅同鄉里

夢草纏綿幾弟兄

謂楊王兩家兄弟

碧海問誰能駐景青山憐

有未招魂

聞鮑雅堂新逝

為君多勸胡麻飴菜把何言地主恩

上巳逢寒食

露桃含笑海棠顛三月江南百媚天冷節風光逢禊節

去年夢想得今年

昨午此時陳乞將歸

池塘薄霧人臨水村落餘

寒戶禁烟合併芳韶付閒逸青尊白髮倍陶然

池上晚坐

物候暗推遷惜春春更妍池光先得月花氣漸含烟意
釣謝鉤餌心聲忘指絃微吟還薄醉隨分送流年

清明分賦白打詞

蹴地柳絲吹不起築就毬場平似砥綠烟何處擲鶯梭
一點飛來五雲裏春雷十面催急撾錦鞦窄袖滾背花
奔星掣電杳無際雙丸脚底翻金鴉昇平樂事陳百戲
角觝尋撞盡呈技健兒欲鬪羽林豪猛士常思戰場利
兩軍白打誰最優分朋合隊爭纏頭衆中喝采好身手
博得官家第一籌自從南征飲飛出七年甲冑生蟣蝨

石筍梯空雪屐穿鐵藜踣穴霜蹄蹶寒食千山躑躅紅
老烏銜紙叫東風招拳惹踢渾無賴羨煞新豐折臂翁
門前鞠域青苔閉貼繡裘金徒綺麗賸有高樓玉筍垂
陌上朝朝盼歸騎何時遠唱凱歌還重入期門褭玉鞭
華林射後開員社

員社 毬會曰

夾路歡呼看賜錢

晚之千墩祖塋

泛泛婁江棹推篷接杳冥岸花明晚露橋火亂春星
人語初投港漁歌別聚汀歸來曾擔墓一意掃松扃

出北郭觀田家作

出郭遠湫囂林垌騁遐矚惠風布雜芳暄陽藹喬木桑
鳩飛且鳴麥雉竄還伏是時春雨後新犁已翻綠道旁
耦耕人即事欣既渥歡然友助風于此見親睦瀕海固
僻陋處野尤質朴瘠土思儉勤易治勝奢俗嘉禾與稂
莠榮悴不同族培覆或倒施生理毋乃蹙樂郊吾所懷
疇能告司牧

趣園獨坐偶占

輕寒淺燠半晴陰罨畫天光綠漸深自笑小園無闊躡
誰知空谷有遐心落花原不關人事啼鳥猶能伴我吟

盡日買春還賞雨濁醪妙理在孤斟

春雨吟與蘇餐霞

即琛溪

沈勿齋話舊作

春雨從東來灑我西園柳衝泥款紫荆喜覩素心友借
問友為誰蘇沈兩者叟問叟年幾何六十有八九在昔
過庭時賢雋滿幕右通門及戚鄰相倚若臂肘始焉踰
霞嶺繼乃指廬阜公等甫及壯僕齒十年後奇文共君
賞疑義就君剖縱筆為詩歌斷斷互可否跌宕弄盃斚
謔浪無不有一朝遽分張碌碌牛馬走蹉跎三十稔一
笑成白首僕病尤蚤衰息意返南畝昨秋招餐霞同飲

黃花酒申言歲寒會慰此離索久每憶長髯翁老屋荒
白淩樓遲吳趨坊旅食寄鋪糗歲除當歸來可約翦春
韭及春聞餐霞二豎苦相守一月不下堂足音杳林數
花朝矍鑠至覲面歡握手為言髯也歸念子意良厚訂
期過清明造談力抖擻聞之適我願蔬饌謀諸婦曉窓
簷溜鳴茲會恐終負筮屐忽楚然掃徑不及帚殷勤道
親故約畧問誰某俛仰已陳迹海上看箕斗少壯曾幾
何逝者不可狃譬如枝頭花新萎異妍醜人生聚散因
數定信非偶况當遲暮辰日昃且鼓缶拍浮鷓鴣杓起

舞為君壽不醉必無歸敢請歌魚留流連未忍別自午
直過酉願以下里詞責君報瓊玖極知困文字他年徒
覆瓿娛老聊復佳豈必期不朽倡予而和汝懷響待徐
叩從此醉與吟相見不離口夜來屋漏痕縱橫篆蚪蚪
穀雨前一日客廬招集觀我生齋看牡丹分韻得
瓊字

芳紅移植原無價衰白來看漫有情曉露未晞猶斂靨
春風不住儘雕瓊夢中彩筆憑誰寄座上青尊好共傾
醉眼更教燒燭照新詩已被月催成

雨窓有感

顛風送雨曉難收
寒壓簾紋懶上鉤
醉被烏嘲空過耳
病防花笑強扶頭
江湖歲月三春老
隴蜀烽烟萬里愁
自覺壯懷消已盡
短蓑腰笛學騎牛

王述葵少司寇惠蓴

湖上綠如許
扁舟采采回
數行勸餐飯
百里致羹材
沙雨詩人屋
江雲野客壘
一般張翰癖
為爾易歸來

石首魚

沙船石首來
登鱸及穀雨
瀕海市販集
貫柳徧江滸
佐

我櫻筍厨詰朝漑鬻金美奪淞鱸腮壓河豚乳包魚
不及賓此義非所取懽言名朋儕有酒亦可滑須臾放
箸空捫腹始撐拄吾徒恣饕餮一飽輒自詡處堂未知
戒隱憂在墻宇側聞島嶼間萑苻久嘯聚乘潮互出沒
搜括盡行賈豈無狼山戍將士實不武坐使伺郊圻近
事頗旁午

乙卯夏秋之交
賊船入寶山境

漁蠻狎波濤生計利網罟連

羣動什百良莠孰剖數况聞海口民多半賊噢咻聲氣
每相應甚為往來主婁郡距一舍左右海門戶東則劉
家河北則七鴉浦近來事䟽濬畚鍤力已苦雖曰惠農

尚倚伏難逆睹鈍翁賦黃魚

鈍翁有黃魚紀事詩

綏靖責祈父是

時海禁嚴截港斷牆櫓晏安百餘年吏民習按堵曲突
謀徙薪無乃笑越俎輟七發三歎空言復何補

酬和餐霞

解組已周歲端居味較長衆中成鈍拙物外閱奔忙喬
木清留蔭幽禽倦斂翔煩君更存問同病好扶將

苦雨

連旬積雨苦難休鼃蠅喧呶燕雀啾嫩籜過牆風折尾
新荷出沼水埋頭病深謀蓄三年艾寒劇思披五月裘

觸想去秋畿輔潦至今猶繫 廟堂憂

午日雨

天為湘纍泣愁雲鎖汨羅蛟龍方攫食赤手欲如何

蒲劍

世有千金價天生九節靈澤蛟能守職海鱷自潛形草
木關兵氣江湖隱將星仙人行藥去囊底出風霆

○ 擬香山知足吟

酌我真一酒撫我無絃琴四座且勿喧聽我知足吟人
孰不欲富焉用贏黃金但得杖頭錢何憂突不黔人孰

不欲貴焉用我華簪但解腰下組拂衣歸故岑人孰不
欲壽焉用致青禽但飽囊中粟二豎免見侵游鯨戲淺
瀨鷓鴣樂卑林薄享而約取造物所弗禁吾於世有待
外驚徒駸駸吾於世無待內反常惛惛有待無待間此
理匪遙深貪夫足求境達士足在心心空境皆空委化
忘古今三復老氏言旨哉夙所欽

自笑

自笑生平誤用心閒中觸撥一推尋性剛才拙時終棄
願大謀迂老更侵總為物情關痛癢難將人事付聾瘖

何如蟬蛻清虛表俛視浮雲漫古今

五月十七日雨後趣園小集餐霞贈詩二律依韻

奉酬

夏扈交飛羽有鶯新犁買犢踐初盟
筍蒲雅會親文酒
桑苧深談較雨晴
雲去月來心自在
波平漚滅理分明
山梁飲啄時哉趣
世上雞蟲未息爭

勸君更盡手中卮
天地長留幾輩詩
微有苦心思舉墜
敢將綿力任扶衰
衆流遞衍三江派
二老應推百世師
往復遺編興曠感
茫茫猶恨不同時

時與餐霞校定梓亭確庵兩先生詩

葆初新歸用前韻示之

春風斲滯上林鶯肯負鄉園水竹盟
牛斗氣衝埋劍暗
金焦影對落帆晴
五羊城遠心常繫
萬卷樓高眼倍明
萱草荆花豐暇日
浮名蝸角底須爭

滄江社侶待傾卮
驢背新添幾束詩
不問升沈知子達
偶逢離合覺吾衰
緇難化素原殊俗
青欲過藍漫忝師
從此名山好商榷
扶輪承蓋記他時

晚過餐霞齋坐待其歸

詩人高詠處
老屋背城斜
薄靄分晴樹
幽姿倚夕花
歸

遲矜獨鶴居陋雜羣蠢欲賦邱中什將來望子嗟

水亭

軒豁水亭開迢涼劇快哉遠風荷氣入驟雨竹光來階
鶴閒長竚池鷗狎不猜底須河朔飲聊試碧甯杯

結夏

結夏學禪栖行吟偶杖藜支離廢人事簡寂得天倪病
葉先秋墮幽禽近晚啼薄涼貪露坐風月儘堪攜

六月二日李松雲館師過訪婁上賦呈

回首蓬山夢境賒十三絃柱數年華

已酉別後距
今十三年矣門前

流水通烏榜座上春風憶絳紗小隱爭迎香案吏新詩

應占石湖家

時僑寓吳門

慶霄為覓霓裳樣催駕銀河七寶

車

將有出山之意

病中餐霞以詩見存次韻奉酬

君患寒疝我暑疝有身畢竟欠安恬殘年同病成衰朽
踰月離羣阻暘炎抱葉哀蟬傷怫鬱守涔困鮒失喁噏
眼前無限關心事倍覺孱軀痛癢兼

總為虛羸久未痊塵書堆按付茫然歎歌已廢情增索
卧起常扶力益綿試發觀濤談塵底好期話雨藥爐邊

直須萬斛天瓢注生意崇朝待斡旋

時盼雨甚亟

靜厓詩續稿卷四

靜厓詩續稿卷五

鎮洋 汪學金 敬箴

古今體六十三首

壬戌七月
盡十二月

七月初三晚雨志喜

當暑時方燠恒暘勢轉驕
吾鄉艱瘠土人力盡枯苗入
夜傾膏乳先秋送次寥
朝來蘇病骨笑舞漫成謠

秋蘭

燕坐妙香中幽蘭發滿叢
氣清能受露蒂弱不禁風
帶病看逾惜忘言意漸融
祇緣抱孤潔臭味罕相同

七夕詞

東有牽牛西織女一水盈盈怨修阻天長地久無盡期
只道銀河風浪苦蟣臣再拜前致辭勸君手挽注下土
一傾西北洗兵馬再傾東南沃焦釜天上應成清淺流
人間已徧滂沱雨

詠並蒂蘭

與子久同心拊聯意自深生香奇不斷妙諦密相尋佩
有連環結琴非獨蠶音盂盆先獻佛合掌證雙林

餐霞見示題張借塘近稿二律依韻奉簡

藝暑偏衫弗上船逃虛無意聽跂然山林漸適忘機趣

文字終留結習緣竹露蘭風親好句餐霞屢示新篇蛛絲蝨粉

惜陳編近校婁詩耳中張祐詩名熟記泛春江一葦烟餐霞邈近

借塘於玉峰舟次始知其工詩曾爲余言及

郊居雅欲避干旌扣角商歌蓬蘽行才調已凌婁十子

姓名猶讓魯諸生借塘名應麟西銘先生後裔就居雙鳳里久未應學使者試經傳

復社多遺澤論定蘇門無改評秋水溯洄人宛在期君

村巷歎柴荆

咏玉簪花

晞髮山阿倚石眠一枝貽我晚涼天影疑玉女盆中卸
樣愛瑤娥鏡裏傳墊角巾低深裊雨研光帽簷遠翹烟
挂冠已學陶貞白料理雲裝作散仙

沈勿齋枉過攜示見懷之作次韻奉酬兼柬餐霞

西涇老屋東涇塾兩月思君意怒如煩惱竟無逃暑法

康彊賴有養生書

勿齋善攝養

小年長日終移換流水行雲

任卷舒開徑相迎情話密竹梧影弄午窓虛

座客皆言髯絕倫芝蘭善氣自怡神還山每覺同岑少
結社先教近局親遲莫風光堪送老新涼雨意恰留賓

舊游惟有蘇端在
覓醉休辭杖履頻

酬密廬趣園桂下之作

涼烟生夕林
人在小山陰
月迴浮香遠
風疎落子深
不凋秋士節
無隱老禪心
為問游仙夢
淮南幾度尋

秋荷

薄翠矜秋潔
輕紅惜晚芳
隔波更疎澹
趁雨漸荒涼
日暮采誰贈
江空情自長
商歌翻水調
餘興寄滄浪

池上晚陰即事

屢憎蘊暑亢
秋陽稍喜微
陰逗晚涼碧
水籠烟添草色

烏雲含雨變林光
半弓鶴柴無人到
一枕鷗波與世忘
冰簟風簾除熱惱
夢情已穩黑甜鄉

中秋與家人趣園泛月分韻得趣字

宿雨洗新蟾
高閣流雲度
圓輝漾方池
長空暖餘素
乘興弄扁舟
上下遞沿沂
江湖在咫尺
妙領烟波趣
兒童喜佳節
老大感商序
倚舷發水調
塵夢警清寤
安得海上槎
直達廣寒路
何處紫雲回
臨風起遐慕

洗研二首

十年塗抹未酬勤
休沐今朝且息紛
星斗一池涵鳳唼

烟雲四角動驪文石交骨在經磨湮水觀心空脫垢氛
子墨疲刊毛穎秃浮湛無恙合輪君

愛渠頭面好犀紋不負原泉挹注殷腕底殘痕驚逝水
眼中陳跡悟浮雲乾坤補幹元黃雜歲月消磨黑白分
盾鼻淋漓刀血漬難將寒鐵策奇勲

八月二十日同人集趣園賞秋叙懷分韻得皎字
天池舉鴻鵠邱隅止黃鳥悠哉曠士懷俛仰齊大小園
林霽日佳秋容洗澄晶微馨動桂巖殘馥依荷沼念我
素心友比來良會少掃徑亟將迎開軒適吟眺列坐敦

古懽盈尊勸清醪元覽隘區中逸趣覓物表觀空心自
夷避俗頭先掉莫賦醉言歸請歌月出皎

不寐

老屋秋深一枕知蕭寥生怕酒醒時幽蛩落葉催寒緊
細雨疎鐘送曉遲病久有身真作患愁多不夢總成疑
朝來更訝流年換滿鏡新霜惹髻絲

風雨

病骨知風雨蹉跎暮景來菁華行自竭懷抱向誰開市
倍新杭價囊空舊藥材更聞沿海戍曉角不勝催

黃蝶

夕陽原上不勝秋怪底尋香苦未休
槁葉淒迷曾夢到寒花冷淡似渠不
烟細空誤三生影金粉難消六代愁
記取道家裝束好乘風歸去有羅浮

九月初籬菊未花同人賦遲去菊詩以懷此貞秀
安卓為霜下傑分韻得為字

物性異寒燠顯晦各以時睠茲籬下英雅與風霜期
今年候較晚秋九猶暄熙衆卉爭負陽熠熠揚芳蕤
世眼艷朝榮惜爾開何遲翻疑造物恩於此或見遺
惟有退

士懷迂緩適相宜寂然葆貞素晚節庶自怡偶來不速客繞徑賦新詩詩成致繼繼臨風寄相思靜躁苟不同懼為花所嗤悠哉柴桑翁忘言契無為

九日過勿齋丈所

已減登高興猶紆訪舊懷行行風落帽稍稍露侵鞋入座古懽洽開籬秋色佳老來辭賃廡歸隱孟光偕

重陽後二日偕蘇餐霞胡密廬王葆初守根兄弟及兒子彥國同訪蔚村陳確庵先生故居舟過鳳里法輪寺時王友梅張春廬王小香從直水來會

野塘秋水暫停橈邂逅支公古寺寮
短榻忽聯新舊雨扁舟同赴往來潮
詩禪活脫千燈續茶夢清圓一磬消
言下木樨香領取斷烟斜日影蕭寥

蔚村詩

昔賢避地吳塘西咫尺髣髴桃花谿
風微人往已百載至今烟水空淒迷
邇來絕少問津者欲往從之阻且躋
夙懷耿耿今始遂賴有同志相招攜
重陽已過好風日極目四野開氛霏
江村景物劇蕭灑穆穆衰柳搖長隄
溪迴路轉導樵牧一葦欲礙橫橋低
沿緣入口忽軒豁

澄潭面面青玻瓈晚霞半落杳無際短篷點拍如鳬鷺
左揖馬鞍右烏目雙螺掩映橫簪筭炊烟隱隱見廬舍
秋潮生浦喧羣雞是時穰稔被阡陌叢祠報賽操豚蹄
客來筇屐意款洽不煩駭愕奔麇麇獨惜堂構竟安仰
斷磚殘甃翻耕犁豈知精氣迴難滅姓氏在口詳岷黎
憶昔卻聘遠城市誅茅結屋來幽栖滄桑劫灰吹不到
坐使俎豆消鉦鼙幅巾落落幾遺老上下今古同居稽
高節直欲首陽並絕學遂與河汾齊四方問字踵相接
爭先慕呂還攀嵇從容餘事薄騷雅興酣落筆縱橫題

傍岸浴童送烟蓑到門漁子供霜臍

蔚村產
蓮蟹

尉遲廟前

散粉社郭母淒畔穿桑蹊先生手揮竹如意浩歌百篇
酒一桮方隅咸指德星聚天文錯落占壁奎聞昔此鄉
本陂澤厥田下下惟塗泥教之築圩捍水患汗邪杭稻
連千畦通儒小試康濟術要為溝壑扶顛隤乃知出處
不異撰放彌卷密無端倪疇其尸祝表功德光復舊宇
崇櫺枰庶幾弦誦起編戶薦蘋藻時來齋徘徊太息
動遐慕吾儕舍此安歸今榜人催返逐暝色寒蟬酸咽
歸鴉嘯倚舷迴望更怊悵一天白露蒹葭淒

蔚村泛月

七十二潭潭水清七十二潭秋月明
夜半驪龍抱珠睡不知何處櫂歌聲

夜泊即事成詠示同游諸君

歸棹吳塘路維舟風露深市燈浮遠水
人語隔高林遼絕思賢操淒其感舊吟
素交永今夕慰此汰漻心

鳳里訪張偕塘不值聞往吳門

相思不相識問訊水雲陂閉戶千秋在
能詩一市知江楓行自好山桂曠難期
何日同尊酒重題絕妙辭

晚步池上

東籬菊色杳難逢
黃葉堆邊信短筇
何處秋光最澄澹
水楊柳映木芙蓉

九月廿二日借塘春廬兩張子自鳳里過訪邀同人小集趣園即席以簾捲西風人似黃花瘦分韻得瘦字

相思肯負黃花候
寂莫寒林成邂逅
石泉披爽寄高秋
文酒娛賓足清晝
舊雨同聲不速來
傾蓋論心捉襟袖
蕭蕭野圃隔塵囂
草草蔬牀出寒陋
座中逸唱遏流雲

杯底狂歌動列宿前輩應推復社賢後來又見清河秀
借塘閉戶擁圖史著書已許名山壽春廬弱冠蓮公車
健筆颺馳轢文囿二子英華信雙壁老眼摩挲詫瓊琇
憶昨扁舟過鳳林得彼失此阻良覲多君惠而能好我
何異連城忽相就更闌燭跋勸酩酊風度隣鐘作鯨吼
出門送客霜滿街萬屋無聲月棱瘦

侏儒嘲

騶侏儒爾來前爾長三尺爾腹何便便俸一囊粟二百
四十錢使爾作吏身弗能佩印綬使爾行陣腰弗能屬

繫鞬巍巍閭闔高九天焉用若曹蟲其間吾將白天子
若曹罪當死侏儒大怖畏啼泣不復止中有一騶頻足
而起仰天大笑先生休矣吾屬誠無益於縣官然使我
作吏飲不過一瓢食不過一簞猶愈於虎而冠者監腦
而剗肝使我行陣結草以跽蹄奮臂以當轍猶愈於鼠
而介者闔墻而鬪穴先生十五學擊劍十六學詩書誦
四十四萬言長九尺三寸餘浮湛金馬門出入承明廬
上不能爲天子進賢退不肖下不能誅夷盜賊使民安
厥居聲謦謦况益高先生嘲人乃自嘲曾不已責而徒

青房詩集卷五
九
恐吾曹嗟噫嘻一騶笑衆騶哭驚雀茫然視鴻鵠大人
變化安可知世上小兒空刺促已矣哉歸去來阿母報
我桃花開朝餐沆瀣夕瓊瑰君不見丞相脫粟真騶駘
此輩坐令侏儒貽

對菊示家人

題餽筵後屢逡巡滿眼丹黃繪小春花有閒情娛歲晏
詩從率意見天真一家團話清寒味半榻安眠老病身
準擬芳樽酬素節燈前形影倍相親

十月初旬菊花始放邀同人作展重陽會以塵世

難逢開口笑菊花須揀滿頭歸分韻得口字

昔聞東坡言有菊即重九達人無滯情歲月爲我有美
此霜下英宿好契陶叟今年花信遲蹉跎屆冬首佳色
忽到眼風日媚疎牖與誰欣賞之所賴歲寒友良會樂
復樂勸子茱萸酒勿爲遲莫嗟珍重晚節久自惜病槁
顏對花增老醜安得酈谷泉一飲願同壽觀化亦何心
代謝不可狃但期續舉觴笑拆冰梅口

舟過鳳里再訪張偕塘

江雨孤舟路村烟陋巷家書聲三里市詩趣四隣花阿

母窺賓喜兒童問字諱君能從所好此外又何加

舟夜

櫓急迎潮雨燈摧夾浦風驟寒欺短褐殘夢壓孤篷暮
景衰癯後閒身放浪中朝來貪泥飲蓑笠就村翁

訟蟲

物美則生蟲蟲生美者死蟲實物自生物盡蟲亦止以
之驗消息彼此相終始當其蠕動時氣化若爲使細者
入芒芴巨者負角齒淺者剝其膚深者竭其髓賦性更
陰賊莫可窮根柢天地曰大生子物安全理奈何殘忍

之厥醜復爾爾至仁至不仁狂愚妄譏訾疇知形氣倫
推遷變成毀傾覆自無心愆伏每由彼試察噬嚙情了
不涉怒喜寢食於其中孳孕附毛裏此之謂蟲天若弗
知所以豈獨物皆然世宙類如是治亂互循環利害恒
依倚休養歷有年數極泰而否外盈內反絀萬蟲由斯
起蟲臣匿帷闥法紀任撓斲蟲士託膠庠章縫習險鄙
蟲民伏里閭椎埋作姦宄元氣漸澆漓枝葉頓披靡行
路或太息有志激深恥那無鉤致術歸獄翦庶民一爭
堅衆黨禍且伊胡底易為君子謀終凶筮天水所以治

蠱義振育斯為美要在清化源審端以竟委節宣苟有
方回幹可徐瑛聖言務知本訟之曷如已

穀人先生由上海來婁留宿菜根軒有詩見贈依
韻奉酬

短棹吳淞翦寒淥月白霜清叫橫竹黃姑塘北落帆風
夜半瓊卮泛金菊去年踏雪尋暗香宛疑仙人騎白羊
江雲欲暮浦潮急如此相思何日忘依舊團爐灰畫箸
紙窓木榻留君處樂全待報新堂成

先生新居
曰樂全堂西湖梅

花詩夢生

無閒緣室看菊分十卦韻同穀人餐霞叔溫密廬
葆初守根及國兒賦

撫時白藏徂僂序元冥屆朋來樂中孚主出病少瘥匝
匝羅花龕氤氲結香界東面淵明籬西頭士衡解容身
一壺寬布武半弓隘向背燦列圖高卑巧排卦列泉養
金精甘漿滋玉瀝監穎聳揚茗駢跼倒披薤細辦斂齏
蛾修翹引卷蠶霞房寒紫凝旭牖晴碧曬燒燈洗糲糊
沃酒起慵憊晚節露貞秀冬心抱耿介久要恬澹交早
退止足戒蝸廬悟密藏鼠壤嗜餘嘍掇英貽隱淪餌芳

制頽邁羣公扶雅輪一笑破禪械險語苦嘔肝奇情癢
爬疥風月助清酣湖山寫雄快虛陪甫里游實下涪翁
拜火急催新詩共了殘年債

寒夜偶成示家人

病菊垂垂不滿窓栖遲蟄室對寒釭豈能形憊神常守
但得心空氣漸降謀婦酒稱供米汁課孫文學打油腔
年來自笑癡頑甚媿向家人說老龐

幽居

幽居絕人事閨戶歲將闌庭曠鶴心遠樓高鵲語寒衰

顏驕酒醖老齒健蔬枰欲叩貞元理閒從物外觀

十一月四日雷

仲冬行夏令號號至何方陽泄虛來復陰凝失退藏震
隣憂地坼障海慎瀾狂政府勤調燮天灾或可禳

叔溫招同人集來錫樓夜飲其地爲明初殷孝章
先生春水船舊址即以先憶吾家春水船句分韻

得吾字

武陵橋南宅一區恒農第弟羣友于文懿

孝章私謚

故址攷

不誣叔也作記詳遺模

叔溫舊有春水船記

廿年一瞬歲月徂脊

令在原良可吁墳荒闌寂響漸孤獨與子季孱相扶友
聲猶幸如風竽異苔同岑久不渝比來料簡二項租入
門幾輩高陽徒今夕何夕霜花鋪朔風凜烈粟起膚烹
雌給鮮傾百觚眼花耳熱肝膽麤滿庭落葉烟林枯古
月斜漏西南隅昔賢芳躅堪追摹舫齋寄興同江湖鄰
鄰春水生綠蕪八窓洞達翔鷗鳬倚舷詩夢尋菰蒲竹
枝水調傳吳歈姚家野航與之俱是時玉山文讌娛天
下健者楊廉夫金粟豪雅雲林迂秦袁呂郭紛來趨此
間賓筵美且都過從曾賦高軒無今之視昔如斯夫坐

惜清淺移蓬壺桑田揚塵入市郭橋頭酒樓不可沽腸
肥腦滿醺隸奴賴有環堵守子儒瓦鑪對話留清癯前
望後顧空踟躕詩書吾好聊從吾豈肯逸翮絀籠斂一
鳴老驥思康衢高歌燭跋狂叫呼三更送客驚棲鳥
滄來守寄木瓜詩以報之

三復風詩絕妙辭一番投贈一番思尺書江海遙相報
碩果冰霜好自持諸子崢嶸秋實在兼寄同學諸子故人珍重
歲寒期此情輾轉應難忘夜半氤氲入夢時

詩志齋消寒十詠

分題家塾將催擊鉢之篇選韻詩齋聊代圍爐
之話各言爾志毋煩主客倡酬近取諸身竊擬
形神贈荅十章成數七字臚吟

詩骨

莫笑詩窮太瘦生天然標格見崢嶸奇如古木孤撐出
秀比秋山半削成羊質虎皮徒索貌蜂腰鶴膝浪傳名
世間粉墨貪形相誰揣君身表裏清

詩眼

詩禪正法許誰求真際淵然與目謀河嶽英靈歸一瞥

乾坤頃洞豁雙眸卜經傳習盲終顯杜律窺尋老更遭
宋蔓唐蕪塵滿睫擬將青白作陽秋

詩腕

愛鵝醉墨興難忘付與詩家妙擅場林下矢音曾共把
花前得句忽先攘彈丸脫手神徧定拄笏支頤味較長
漫道推敲工作勢何如椽筆一揮強

詩肩

笑拍洪厓汗漫鄉側身獨立咏蒼茫微哦倚竹輕拖袖
小坐偎花穩卸囊尋雪瘦兼驢背聳迎風高與鶴尻揚

書人言集卷之三
山樵歸擔渾相識一路行歌送夕陽

詩吻

箇中妙悟本難傳味到含毫意邈然餘唾肯尋牙後慧
真詮不落口頭禪款成珠玉霏霏下吹入笙竽的的圓
斗酒百篇先解渴麴車底事更流涎

詩髭

先生休笑口無毛白髭鬚頗自豪得意者番同摘頷
傳神阿堵與添毫閒揮松鬚參詳熟細數花髻點勘勞
一字吟安頻撚斷那容狂率付兒曹

詩斑

塗抹風塵染髻昏
守元知白漸成髡
似緣窺豹推尋得
豈爲歌狸想像存
叢竹啼娥沾露籜
飛蓬思伯斷霜根
朝來搔首微吟處
點點青山映燒痕

詩膽

一世詩豪衆所稱
詞壇拔幟勇堪矜
獐龍雕虎雄如斗
怪雨盲風怒有棱
狂態問天杯放誕
浩歌斫地劍憑陵
小巫技倆同山鬼
險語橫來破未曾

詩脾

捫腹何從索解頤腐腸多半屬糟醅委輸華液方成妙

吐納清虛始出奇妙轉淒音頑艷感

用繁欽
戕語

雋留酸味

瘦寒知

脾主酸
出管子

此中塊壘休相訝不合時宜一肚皮

詩心

從來詩教本無邪只恐源頭一竅差大海波瀾收芥子
先天芽紐露梅花幽懷靜細覘春蠶妙語清圓韻午茶
會得心心相印理謫仙有句贈僧伽

贈顧雲谷

滄江風雅溯源長顧謁頭猶見老蒼昔有高賢曾賃廡

近來佳士半居鄉西河阿母傳經在

雲谷母毛太君有筠雪軒詩稿

北

里諸生問字忙鄭重名山他日事好將隻眼寄鉛黃

近見

評閱邢香光稿甲乙極當

養拙吟

鑿竅混沌死忘機桔槔息吾聞古至人淳悶為真宅拙
固天所靳內養葆純德奈何夸毗子攘敎自戕賊嗟余
晚聞道世途苦逼迫拙宦恥捷足拙生昧長策文辭性
頗親近亦事拙率巧者枉其形拙以存吾直偽者勞其
心拙以任吾適養一而得三吾計又奚惑

避寒晨不出

避寒晨不出擁褐戀溫曦鳥影過窓疾茶聲到枕遲靜
來禪味在老至病根知一線春陽動重尋子半時

安樂窩歌

古今傳舍造化廬世人錯認壺公壺開鑿戶牖先天圖
前有希夷後堯夫堯夫先生隱嵩洛自署一窩號安樂
孔顏妙境此中尋伸屈焉能測龍蠖欲記不記夢覺時
簾外落花春晝遲

二語本康節
安樂窩詩

朝披皇極編暮吟擊壤

詩未覺黃農去人遠翻疑天地於我私履道坊西訪廬

宅兒童拍手銅駝陌小車緩緩向誰家獨樂園中成主
客僦居記自嘉祐年後來頗費諸公錢浮雲止水兩無
住行窩是處皆隨緣四海顛連念民物康濟終須賴儒
術但願廣廈千萬間肯爲安身謀一室豈知理數有平
陂介石之占不終日君不見杜鵑啼到天津橋從此先
生病不出

喜雨

秋旱連冬臘江鄉望澤遙不因復七日那得徧崇朝井
汲通銀綆畦蔬起翠苗同雲祝三白扶杖聽農謠

殘臘

蜜梅香裏夢清酣
殘臘風光老最諳
自快負暄觀里蜡
為慳行雪念田蠶
禪人游戲燒豬頌
野老過從捫蝨談
無那冰毫偏凍澀
難絨尺素報詩龕

近得時帆詩札未
有以應故及之

冬蟄聯句用真韻

大道有屈信

餐霞

一氣感羣類
邁茲栗烈辰

靜厓

取爾

退藏義山材
落實儲

止庭

晦鍾蓄租備
塞向戒寒局

密

廬鑿坏遜幽
隧惟蟲能以天

寧夫

咸蟄本乎地
當其啓

震出

葆初

疇弗乘陽萃
橐吹鼓肖翹

守根

房發孕蕃孳

在宥靈蠢均

霞

司閑舒慘異隱嵐竅混沌

靜

堅澤腹負

鼎萬象入汭凝

止

四生伏潛閤靜歸性命根

密

動慎陰

陽忌盡族効負趨

寧

同功謹塗陞阻深絕梯衝

初

逃虛

遠鉤餌巢構亂葦茗

根

丸封小翼甄壁縫穴鏤空

霞

籬

罅竇穿邃誰爲淵叢毆

靜

儼作林藪避槁如僧破參

止

膏如漢瞋睡兀如翁吟癡

密

沉如客酤醉酸呻嚙如癰

寧

苦顫怵如惴奔蹶如逋亡

初

卧喘如顛墜或僊如老

癰

根

或駭如蒙穉或寂如聾瘖

霞

或痿如頑痺角者失

抵排

靜

牙者奪鬻恣走者斂軼騰

止

飛者收擊驚喜者

外杜喧密怒者內銷異弱既無所求寧強亦何所恃墮

蟬劇千變初蛻蟪要一致亭育元紐宏根翕闢密鍵祕

知機警先兆霞觀物攬衆智履霜惕坤初介石貞豫

二君子重謀身止小人昧藏器致用師蚩蠖密忤時懲

索聒顯晦苟相違寧行止問攸利瞿瞿蟋蟀情初冥冥

鴻鵠志匪直謝矰繳根本不慕飲食息游賦閑居霞放

卷樂素位守雌妙無爲靜治蠱高不事邵窩且乖吟止

陶廬有真意眇焉蟪處曉密曠若雞化臂俛仰充蚓操

寧浮休付蝸寄檢囊賀句慳初聯鼎郊音賴雕篆譏固

宜根

委蛻笑姑冥霞

臘月十八日喜雪借用坡公正月十八日蔡州遇

雪韻

老圃坼槁壤生意艱枯根坐令曝背翁杲杲愁朝暾三
日積霧雨飛雪忽灑軒霍然蠲憂忿如獲蘇與萱遺蝻
既入地朔氣排冬溫始知造物功回斡妙無痕從此翕
闢理禪續通貞元吾廬晏無事泥塗息勞奔開簾對花
舞掩幕避風掀晨興靜觀易白賁喜邱園

坡仙生日詠蠟梅和集中韻

布地忽散黃金花，維摩天女同一家。
讀罷楞嚴悟嚼蠟，卻笑橫陳是何物。
箇中蜜味鼻先知，只恐破禪猶有詩。
此事須當問迦葉，云何舉似根塵絕。
記取名因五祖山，西湖留證僧窓眠。
髯仙別花潁州去，聚星雪後重題句。
昨歲吟詩吳穀人，舊臘是日穀人從杭來
會並攜蠟梅詩見示今年丸書更寄君。
書到西湖夢飛越，乞得一枝伴釐鉢。

雪後寒甚

初日照殘雪，深寒殊未休。
濕脾妨酒醖，風腋引茶甌。
頗憶鄒生管，難忘晏子裘。
春遲梅信勒，筇屐緩林邱。

鶴梅篇

仙人搏弄瑤臺雪羽翬銖衣兩奇絕付與孤山處士家
眷屬三生伴幽潔雲中逸翮誰籠絀林下寒香自怡悅
十年仙頂養丹砂一夕天心露氷纈白羽之白白玉白
先生歲寒照高節東風攬海塵冥冥萬古青山月如珎
須臾吹滿羅浮春黃鶴樓頭一枝鐵

地爐

木榻蒲團擁不眠十年凡火養凡鉛而今不用抽添法
覓取天光頂上圓

靜厓詩續稿卷五

靜厓詩續稿卷六

全稿第三十卷

鎮洋 汪學金 敬箴

古今體三十六首

癸亥正月盡
甲子二月

元旦試筆

蔥蘢晴旭映文憲豐玉宜年樂此邦奇字老猶探亥六
祥占雛更祝丁雙麗春綵勝聯燈炬上元前一日春錢臘冰蒨
侑酒缸遙聽朝回傳好語萬方送喜吉金撝

新年與家人小飲

歲月閒中老田園物外情菰羔充晚食竹馬繞春聲天

幸有三樂吾生無一營
新蟾弄眉意剛對酒波橫

人日開塾即事成詠

物外風光也自忙
人揩老眼閱新陽
寒宵松火親茶榻
人日梅花媚草堂
童塾誦絃勤請業
賓筵酬勸儼成行
歸田重訝流年換
贏得辛盤次第嘗

文徵仲小景自題云
澹煙蒼靄畫沈沈
白髮青春好自禁
寂歷梅花猶勒雨
蹉跎人日苦多陰
步來野徑緣谿靜
愛此郊堂入竹深
車馬不驚魚鳥狎
居然城市有山林
壬辰人日與之北城別業小集

是日風雨寂寥梅萼未破故詩及之今年人日邀
蘇餐霞沈勿齋王純菴楊叔溫勤齋顧漱泉胡密
廬王葆初守根集趣園同觀是幀風日晴佳早梅
半放景物有過於昔所云者因用其韻賦之並屬
守根作圖以誌勝賞時嘉慶癸亥也

雲煙過眼付銷沈比似風光取弗禁閱世人傳三絕妙
賞春天捲一重陰觀之不足篇題在余凡四逝者如斯
感慨深幾度梅花幾人日那無點筆貌薌林

十四日立春晚筵卽事

試燈風後見春幡花月簾櫳逗夕暄海內屠鯨洗兵馬

時聞功告歲大

山中抱犢話田園弄孫自愛扶攜便避客應

憎謁謝煩却憶傳柑天上事太平饒吹徹宵喧

生春分韻五首

何處生春早春生在赫蹏瑩花明似鏡融墨膩于簪暖
閣和雲研晴窓映雪題貝多持一片金粟印菩提

何處生春早春生在膽瓶花禪新入定水觀妙通靈如
夢參香色無言契影形欲知溫養候胎息驗黃庭

何處生春早春生在瓦燈醉筵搖月暈倦枕飈風棱花

喜新年吐膏愁永夕凝閉龕無盡義證取白頭僧
何處生春早春生在夜篝近人偏熨帖煖老剝溫柔花
氣含薰待潮痕積潤留 賜緋箴笥經歲袖香浮
何處生春早春生在短絨雪消江鯉信花發隴梅函歲
暮人千里天寒月半巖因風問瑤海青鳥影影影

咏蘆花鞋

織屨先知窮士心禦寒差不廢行吟春江一葦留趺影
秋水叢葭寄足音登壟暗隨烟雪亂墮橋閒傍水雲尋
雙鳬本與滄洲狎從此仙蹤深復深

青人言集卷之二
雨窓口占

朝擁蒙茸冷不支東風簾幕織如絲
買春賞雨閒情味
細嚼梅花獨品詩

十雨詩

喜雨

昨夜燈花預報來林鳩得意故相催
休嫌翠冷含顰斂
已詫紅酣帶笑開
水牯穩翻三尺浪花驄快送一聲雷
洗兵饒曲傳江甸
額手天膏徧草萊

聽雨

小樓點滴最分明鈴索虛搖耳細傾寂歷空階愁自切
惺忪殘枕夢難成勾依宿火煎茶候悄入枯枰落子聲
破曉賣花穿巷過遙知紅濕滿江城

題雨

橫排豎灑意蒼茫蟄起蛟龍腕底強方道催詩寤慘澹
故教潑墨恣淋漓浪雲垂海立詞流倒石破天驚筆陣張
苔沒陰廊人不至也添蝸篆上欹牆

賞雨

社後占壬信有期買春滋味玉壺知珠跳鏡檻鉤簾處

花壓旗亭畫壁時
泥客笙簫殊未歇
尋僧笠屐也相隨
閉門別有孤懷寄
深酌長謡總不辭

坐雨

蒲褐生涯寄古寮
萬緣喧寂此中消
窓沈香篆趺猶結
榻緩琴絲手自調
四座忘言情黥黥一
林送響境虛寥
雨花布滿維摩室
定後禪心未許撩

話雨

俄然空谷喜登音
有客衝泥到石林
飄泊共論新舊跡
纏綿如伴短長吟
三更驟棧鈴中記
十稔雞窓柝外尋

莫惜今朝頻翦燭聯床好待曉鐘深

踏雨

前村不住鵝鵲啼峭緊芒鞋渡遠谿斷磳盤渦貪覓路
新葩細草惜成泥深留水磨團團跡暗滯星郵得得蹏
儂本桃花潭上客踏歌只在暮雲西

泊雨

便欲揚帆破遠空無端愁水又愁風魚吹白浪爭鳴柁
鳥沒青山獨揜篷燈火微明楊柳岸炊烟深罨荻蘆叢
泥塗蹤跡休相笑泛宅浮家一老翁

課雨

布穀聲中勢漸綿，溝塍活水已濺濺。
農忙自試翻犁手，吏寢休論權算錢。
叱犢過畝催潑火，呼龍歸洞待耕烟。
田家節候從頭數，月額占來又幾天。

釣雨

無數蜻蜓颭水飛，春陰濃綠染苔磯。
江昏風笛不知遠，日暮烟蓑何處歸。
點急鳴榔千縷密，影飄沈餌一絲微。
鯉魚尾上霞天閃，曬網家家趁落暉。

滄來同年自徐州移守蘇郡寄示尊照因題一絕

彭門千里下吳閭展卷驚看髻髮蒼夜半江潮將夢去
東風鈴索木蘭堂

題夜紡授經圖為蕭振西冠英兄弟作

城南兩蕭生窮經嗜樸學兼治古文辭志行殊卓犖伯
也登計車聲名動燕涿歸授經圖紙墨出新兒竊惟
母氏賢冰霜歷寒剝恤緯心自勞晝荻義親擁嘔軋入
蠶吟咿唔到雞喔晨炊半溢寒夜燼一燈爆訓詁辨凡
將音韻析宮角防慝屏裨乘戒荒遠棊槩勿為金躍冶
務使玉就琢一朝毛羽成丹穴見雙鸞春暉苦不留撫

卷淚盈握生平提耳言黽勉守愿慙吾欲勒彤史持以告閨幄坤章代有終高風企遐邈

曉之九曲

沿緣分曉路一水溯洄勞短棹迷深竹孤村露小桃海流窮北際壟脈起東臯丙舍廿年感蹉跎歎髣髴

得程愛廬侍御耗

歿於閏二月十五日

極目吳淞水期君一葦杭遲回吟碧杜奄忽厄黃楊夜雨繡經榻春風問字堂淒其十年事獨立意蒼茫

廿二日同人約之城南觀桃為雨所阻叔溫邀集

春水船晚酌分韻得晚字

曉夢逐仙源乘流不知遠簷溜破惺忪殘枕失雲巘坐
惜城南花狼藉在泥阪駕言笠屐尋欲從苦跛蹇豈無
霽日好在萼青陽晚賴我同心友一樽慰繾綣君家春
水船昔賢舊池苑當時觴詠處花木繞畦畹遙知烟波
際邂逅清揚婉分明入天台窈窕引劉阮陵谷遞變遷
斷梗隨仆偃祇今三畝宅蕪沒數株本勸君乞桃栽荒
澀亟鉏墾一歲纖茗發再歲柔枝踈三歲花實繁樊柳
以為榵接花作盥頰落實充餐飢護彼風雨妒樂此邱

園遯既免步履勞匪直坐卧穩於我亦有益與君更奚
損然姑妄言耳日月逝袞袞白盼媽紅奈何弗自反
不如盡君酌差比飲河龜扶醉語纏綿舳舻待城堰時以
小舟回首武陵橋却笑漁郎返

韓旭亭丈從嚶城過訪留飲小園雨中看桃花即
席分韻得春字

釣魚臺下一番春吹散長安陌路塵

辛酉之春同游釣魚臺看桃花未幾

余乞假歸旭亭亦於是秋南下

問渡偶停婁水檝尋源應憶武陵人

次

桂舫廉使時官南楚

綠蕪紅雨關心舊白髮青陽觸眼新擬借酡

顏鬪嬌姹東風沈醉肯辭頻

霽後同叔溫密廬看桃花已半謝矣感而賦之
城南屐齒已成蹊逐伴嬉春一杖藜流水彎環尋畧約
飛花歷亂數招提愁風愁雨源難覓憐葉憐根渡易迷
道眼果能空色界紛紅駭綠總塗泥

同餐霞叔溫密廬泛舟吳塘即事有作

一棹不知遠陂塘如此幽梅炎消薄霽瓜漲漫安流我
輩野鷗鳥人家水牯牛勞生紛感觸何幸得歸休

題守根生香不斷圖

春蘭秋菊如夢朝薜暮茵何因一篆雲龕小影雙鬟月
鏡前身

坡仙生日同人集井福堂用集中次李公擇梅花
詩韻作詩時癸亥十二月十九日

人生百年內俯仰隨羣動塊然負血氣造化戲搏弄剝
那衰老病偃蹇就蟄凍回首少年場譬若市一闕嗟予
蒲柳姿中歲忝侍從再出再引疾 恩許壑魚縱歸田
賦閒居三徑來二仲竊擬康衢謠謬附輶軒貢詎意邁
膏肓經冬轉增重藥鼎號蜩寂苦澀不成吟兩月不下

堂輟簡廢吟諷今日良讌會扶拜忍酸痛瞥眼萬玉花
列隊雲荼雍春風生腋下恍惚羅浮夢瑤仙渺何所拱
把十年種看花人已憊歲月等飛鞚安得花下樽常與
諸君共揮手招老髯鞭笞下白鳳沃我真一漿從子神
清洞何為困塵勞醺雞戀胥甕

小除夕

物外年光盡病中人意閒桃符空爛漫菜把竟孤慳寂
寞寒梅在啁嘲暮雀還此時堅卧雪未許啓柴關

甲子元旦試筆

獻歲春 王新甲子餘年扶杖祝昇平老成自豫匡時
畧衰病猶紆望 闕情上日梅花親白髮中原瓠子繁
蒼生疲氓瘠土吾鄉甚憂樂無端為雨晴

和玉水內弟韻

東華携別處彈指幾經春鬱鬱成佳士樂樂念棘人冰
霜歸棹苦燈火故園親依舊簷梅發天寒味最真
歲月成衰老池臺怯共臨香知寒裏定春惜病中深子
有燕雲夢吾為吳會吟逃虛雖已久空谷喜登音

和玉水雨中落梅之作

一笛江村怨曉春半隨流水半沾塵羅浮風雨夢中夢
姑射冰霜身外身離却影形諸相活破除香色萬緣真
從知丈室維摩病合配孤山處士貧

男彥博彥國校字

靜厓詩續稿卷六終